

25. maj 2020

**Soraarnerussutisiaqalernissamut aaqqissuussinermut pinngitsoorani ilaanissaq pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortat Hans Enoksen, Pele Broberg, Jens Napãtôq, Partii Naleraq)

Soraarnerussutisiaqalernissamut aaqqissuussinermut pinngitsoorani ilaanissaq pillugu Partii Naleqqap oqallinnissaq aallaavigalugu saqqummiussaannut qujavugut.

Innuttaasut soraarnerussutisiaqartalernissaat pillugu oqallinnerit ukiuni arlalinni ingerlanneqarsimapput 2016-imilu Inatsisartuni amerlanerussuteqarluartunik akuersissutigineqarluni.

Suliarineqarneratalu nalaani paasineqarpoq innuttaasut 9.000 – t missaaniittut ajoraluartumik utoqqalinissaminnut katersaqanngitsut. Taamaalillutillu pisortanit utoqqalinersiat kisiisa utoqqalinerminni isumalluutigisussaallugit.

Kisitsisit taakkutaaq takutippaat innuttaasut arlaqartut katersueriaatsit assigiinngitsut atorlugit utoqqalinissaminnut katersaqartut.

1.januar 2018-miit aallartinnerani ajornartorsiutit assigiinngitsut minnerunngitsumik ukioq maannamiit saqqummertalersimapput, taakkulu sulii ullumikkut paatsuungatitsisarlutik.

Naatsorsuutigilluinnarparput ajornartorsiutit taakku iluarsineqarnissaannut Naalakkersuisut piaartumik Aaqqiissutissanik suliniuteqassasut. Naalakkersuisut ilumoorput oqaatigigamikku aningaasat katerorneqartut innuttaasut pigigaa.

Inatsit sunaluunniit pitsaanerusunngorusullugu suliniuteqartoqarsinnaavoq, taamaattumik Siumumiit suleqataarusuppgut pitsanngorsaataasinnaasunik ujarlernissatsinnut.

Maanimi isersimasugut tamatta pisussaaffigaarput siunissami utoqqanngortussat pitsaanerpaamik pineqarnissaat sulissutigissallugu.

Siumumiit pingaartipparput siunissami utoqqaat namminneq katersaqarsimanertik aqqutigalugu aningaasatigut toqqissisimanissaat pinngaarlunnartutut isigigatsigu.

Aammattaaq Siumumiit isumaqarpugut ullumikkut ingerlalerneqarnera unitsinnaveersaarneqartariaqartoq. Taamaaliortoqassappammi peqqissimissutigineqarsinnaavoq katersinissamut kinguarsartoqarsimappat.

Inuusuttuutilluni katersilerneqarnerup kingunerissavaa suliuinnaarnermi tigusassat amerlanerunerat. Taamatut oqaaseqarluta oqallittoqarluarnissaanut qilanaarpugut.

Hermann Berthelsen

Siumut